



Selasa, 20 Oktober 2020
Ogen: Filipi 4 : 10-13



Kiniteken Radu Erdalan Ras Perbeben



Kegeluhen erpaksa-paksa, kegeluhen erbage-bage, kegeluhen arus tetap idalani manusia. Desken panggung sandiwara, enggo lit sutradara si ngaturken perdalanen cerita. La lit si meteh kuga kedungen cerita e, selain sutradara tapi siniarapken maka kerinana banci 'happy ending', dem keriahen, kemalemen ate bagi si iarapken manusia i bas kegeluhen e. I bas ndalani perdalanen e labo kita sisada, nterem kalak lit i bas perdalanen e, lit si mediate, lit si la erdiate, lit si natap-natap, lit jadi imbang bagepe jadi teman.

Bageme Rasul Paulus nuriken kerna pengalamen geluhna, i bas kerina situasi tetap ia ngatakan bujur man Dibata, subuk paksa lit simperdiateken ia ntah lang. Paulus mpebelin pusuh si erpengangkan (memaklumi) kalak sideban i bas kerina kecibalna. Tep-tep kesimpulen si ibahanna arah kaca mata si mehuli, iukurina kalak sideban i bas erbage kemungkin si la perlu iidoi. Arah kerina kejadi si inanamina, mbelin proses erlarjar si idatna seh maka ngasup ngidah si mehuli ibas tep-tep kejadi si inanamina. Seh maka rahasia si mbelin kerna kecukupan idatna tampukna. Mbue ntah sitih, lebih ntah kurang, cukup ntah lang tergantung kepe ku bas kengasupenta ngaloken ras makeken kuga litna. Alu bage i bas kerina situasi malem atena nggeluh. Paulus seh kutampuk pengangkan ras pengertin kerna kegeluhen.

Kuga kita ngidah ras bertahan i bas situasi kegeluhenta si banci saja sue ras sukat-sukat doni lanai terganggu? Pengakun Paulus maka ngasup ia ngalaken kerina keadan erkiten kuasa si ibereken Kristus man bana. Nggo nge iidah kuasa Kristus si iberena man banta? Sipakeken nge? Kengasupenta ngalaken erbage tantangan e erbahan maka sidat tampuk perukurenta ibas kiniten man baNa.

